



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 8

Elections nung BSP-i tangar den meloktepi tokteptsü: Mayawati

Australia den masaya tsungda Jadeja Ranji nung asayatsü



VOL. XX NO. 94 (ADOK 94) DIMAPUR

TENTONÜ (MONDAY)

ANEJETI (JANUARY) 16, 2023

₹ 5.00

Nepal nung tayimtsü ka tsükok; 68 asü

Kathmandu/New Delhi, January 15, 2023 (Agencies): Deobarnü Nepal kübok Pokhara nung Yeti Airlines ATR 72 tayimtsü ka tsükokdang nisung 68 asü.

Tanep 11:00 ako meta tayimtsüji tsükok aser iba tayimtsü nung India nung 5 mena liasü.

Iba tayimtsü nung passengers 68 aser crew 4 mener Kathmandu nungi Pokhara-i apusoa ao. Ajisiaka minute 20 shi orr külem tayimtsüji tsükok ta osang ajanga ashi.

Iba tayimtsü nung mena aliba India nungjerji Abhisekh Kushwaha, Bishal Sharma, Anil Kumar Rajbhar, Sonu Jaiswal aser Sanjaya Jaiswal nung ta jangjaogo, ta Yeti Airlines ketdangsur kati ashi.

Iba tatalokba bushisungdangtsü atema Nepal sorkari zungsem pungu agi akumba commission ka tentetogo.

Tayimtsü tsükokba sülen Prime Minister Pushpa Kamal Dahal-i Council of Ministers indang rongdak senden ka ayonga amendang commission ka tentet. Nepal sorkarisa Hombarnü anogo ka 'national mourning' asütsü atema sangoktsüogo.

Nepal Army otongdar kati ashiba agi parnoki tasü mang kar angutsü imlar.

Tayimtsüji tanep 10:33 nung Kathmandu nung aliba Tribhuvan International Airport nungi apusoa aser Pokhara nung tayimtsü

anendak anasa Seti River tsüküm nung tsükok ta Civil Aviation Authority of Nepal (CAAN)-i metetdaksü.

Iba tayimtsü nung bendanger 15 aser tanur 6 dena liasü. Tayimtsü nung amenertemji Nepali 53, Indian 5, Russian 4, Korean 2 aser Argentina, Ireland, Australia o France nung kaka mena liasü, ta Yeti Airlines-i ashi.

Tayimtsü apusoa orr minute 20 shi meta tsükok aser iba ajanga tayimtsüji airport nung anenzüksü atema aludang tsükok asütsü akok ta bilemer. Iba yimti ana tsungda tayimtsü agi minute 25 shi agir.

Tesüiba mapang Nepal nung tayimtsü lendong balala nung nisung noklang aika süogo.

May 2022 nung Nepali carrier Tara Air indang tayimtsü ka tsükokdang nisung 22 asü. Iba lendong nung Nepal nung 16, India nung 4 aser Germany nung 2 asü.

March 2018 nunga US-Bangla Airlines tayimtsü ka Kathmandu indang International airport anasa anendang tsükok aser iba lendong nung nisung 51 asü.

1992 küm nungi Nepal nung tayimtsü lendong tamajungtiba atalokbaji Pakistan International Airlines tayimtsü ka Kathmandu-i arudang tsükokba liasü. Iba lendong nung tayimtsü nung mena alir nisung 167 asü.

Ita ana tejakdang Thai Airways tayimtsü ka Pokhara airport anasa tsükok aser idangji nisung 113 asü.

DGHS aser MoHFW, GOI-i Dimapur semdang

Dimapur, January 15, 2023 (TYO): Director General Health Services aser Ministry of Health and Family Welfare (MoHFW) GOI nungi teshimtet telok kati January 15, 2023 nü Dimapur nung NCDC Branch building semdangogo.

Director General Health Services & Director National Centre Disease Control (NCDC) Prof. (Dr) Atul Goel aser Jt. Director & Head (Estb. & Strengthening of NCDC Branches), MoHFW, GOI Dr.

Shikha Vardhan nati Dimapur semdang. DGHS Prof. (Dr) Atul Goel-i tang mezung atema Nagaland semdangi aru.

DGHS-isa CIHSR nung BSL2 Laboratory, Burma Camp nung Urban Primary Health Centre aser Dimapur District Hospital semdang aser idakji aliba staff den ajurutepa sensaksema liasü.

Prof. (Dr) Atul-isa Principal Director, Dr. Temjentsungla-i anir Department of Health & Family Welfare ketdangsurtem den sensaksem.

ECI sangdong ajanga nübortem ratateper: NPCC

Dimapur, January 15, 2023 (TYO): Election Commission of India (ECI)-i Constitution nung aliba ama assembly election agitsü ta sangoktsüogo ajisiaka February 15, 2023 nungi CBSE Examinations agitsü lir ta NPCC President K Therie-i ashi.

Anungji February 15 matongdang election agitsü süra anogo 30 dang anünga lir saka election agitsüba osang ya anogo 45 jeliasa sangdonger. Anungji ECI-i osang sangoktsüba sülen President's Rule mesüra election agitsü ta nübortem ratateper.

Chief Minister-i menden nungi

alutsü ta shia arubaji tiyazü dang liasü kechiyong nisung shingai pa menokdang, ta K Therie-i ashi.

ECI-i kechi südir süaka election agitsü ta ashiba ajanga nübortem agreed solutions ama mapa inyakang ta akhangba magizükba sayur. Anungji iba ken o atema telemtebaji India sorkar ket nung dang lir, ta pai ashi.

Congress-ibo agreed solutions mapa kuma inyaksü atema tongti süa inyaker aser BJP sorkar ibaji meinyakra, parnok ya tiyazü jembiba telok ka ta zungshitsü, ta NPCC President-isa metetdaksü.

AKM 69 buba Inti Mungdang Jan 18-20 Akhoya yimdak akatsü



AKM 69 buba Inti Mungdang dak sentakba nung osangbener senden ka parnok office nung akadang AKM tir Nungdokyangger Ao-i anir par külem ketdangpurtem noksa nung angur. Mokokchung, 15th January, 2023

Mokokchung, January 15, 2023 (TYO): Ao Kaketshir Mungdang 69 buba lokti senden "Mapaküm Shishaluyim" omen dak rangloker January 18 nungi 20, anogo asemnü Akhoya yimdak amungtsü sentong renemogo. Iba asoshi luden balala shima mapa lemer mazüngi inyaktepar, ta AKM tir, Nungdokyangger Ao-i ashi.

Kaketshirtempei azüngba reju nungi kulikaket ka agizükbaji dang masü, pai/lai angazükba ajanga pei takümüji tagitsü aketba senso ka kuma zungtetsü tim. Shishaluyimba mapang alima yimya ka ama zübazüba azüngbaji masü saka tarutsü pei nübur aser kin nem tajanzük kadaktsütsü asoshi peii inyaktepar mapatemji alimai nungdaksüsa aser tagidak kadaktsütsü asoshi azüngtsüla. Anungji, item dakji rangloker taküm iba mungdang "Mapaküm Shishaluyim" omen ya shim, ta Nungdokyangger-i ashi.

January 19 nü iba sentong nung Nagaland Chief Minister, Neiphiu Rio tongti tesemdang asütsü jaoka lir. Jan 18 nü PWD (Housing & Mechanical) Minister, Tongpang Ozüküm-i mungdang lapoktsütsü aser Jan 20 nü Higher Education & Tribal Affairs Minister, Temjen Imna Along Longkumer-i mungdang shibangtsütsü sentong renema lir.

Kasa sentong nung Nagaland Legislative Assembly Speaker Shiringain Longkumer, RD Minister Metsübo Jamir, Industries & Commerce Labour & Employment, Skill Development and Entrepreneurship Advisor Imnatiba parnokji alakteta jaokertem lir.

Er. Moa Aier, Engineer-in-Chief Department of Power aser Er. Atoba, Engineer & Technology Entrepreneur Founder, Tabernacle- the Go-to-Software for Churches tenati

"Mapaküm Shishaluyim" onük nung jembitsü.

Sentep balala nung Mokokchung DC Shashank Pratap Singh IAS, Tuensang DC Nokchasashi, NSF tir Kegwayhun Tep, ENSF tir Chingmak Chang, Central Nagaland Students' Association tir R. Sunep Pongen, Ao Senden tir Chubawati Longchar aser Watsü Mungdang tir S. Arenla Longkumer parnokia shilem balala agitsü sentong nung tenüng teta lir.

Iba mungdang ya AKM YouTube ajanga 'live stream' asütsü, anungji mungdangi marutetertem pei alidak nungi ayongayonga repringtetsü, ta AKM tirisä metetdaksü.

Iba mungdang tsükdakradang kecha mekai tobur junga aser takok manung tembangtetsü asoshi shisa tajung agütsüba den sarasadem nung nungitdaksünür, ta AKM tir, Nungdokyangger-isa ayongzük.

Nagaland nung ita 12 tsungda lanur 35,000 training agütsütsü

New Delhi, January 15, 2023 (Agencies): Nagaland nung taruba ita 12 tsungda lanur 35,000 tashi Pradhan Mantri Kaushal Vikas Yojana (PMKVY) 4.0 kübok training agütsütsü.

Iba ya Skill India Mission nung shilem ka ama inyaksü ta Union Minister of State for Skill Development and Entrepreneurship and Electronics & IT, Rajeev Chandrasekhar-i Deobarnü metetdaksü.

Iba sentong kübok lanurtem nem AI, blockchain, Electronics and IT/ITES to mobile repairing, vehicle maintenance, agriculture & allied sectors amala indang courses aser skill training agütsütsü, ta pai ashi.

"PM Narendra Modi-i India

nung lanurtem tejangraba aser taginüba amshia New India ka yangertsü meranger. Tanü maongka aika lir anungji item maongka agitsü atema skills kanga tongtipang kümogo" ta MoS Chandrasekhar-i ashi.

PM Modi-i Sabka Saath Sabka Vikas alizung den liromedema Kohima aser North East India nungi startups o entrepreneurs adoktsüla, ta paisa ashi.

Nagaland nung Government ITIs 8 aser JSSs 2 dak alia PMKVY kendras 3 aser training centres 11 lir. Item nung courses balaka agiba ajanga Green jobs, food processing, leather and sports, Electronics aser logistics wadangtem asoshi special projects tenzüksü. Tesüiba

mapang nisung 25,367 tashi PMKVY programmes kübok training agütsüogo.

Government schools, engineering & general colleges, Kendriya Vidyalaya, Jawahar Navodaya Vidyalayas, Industrial Training Institutes (ITIs) aser industry nung Skill Hubs ulushitsü.

PMKVY 4 kübok Nagaland Tool Room & Training Centre (NTTC) Dimapur, Mongken Apparel Production Unit Dimapur, National Institute Electronic & Information Tech (NIELIT) Kohima, Dimapur Government College, Kohima Science College, Jotsoma aser Software Technology Park of India (STPI), Kohima dena lir.

New Changsu village Baptist Church Platanium Jubilee nung DY.CM-i shilem agi



New Changsu village Baptist Church Platanium Jubilee mong nung Deputy Chief Minister Y.Patton-i jempiba noksa nung angur.

Dimapur, Aenjeti/January 15 (TYO): New Changsu village Baptist Church Platanium Jubilee, January 13 nungi 15 tashi mungogo. Iba jubilee mung ya Mathi 5:16 dak nungi agizüka "Let your light shine" omen nung ajemdaker mungogo.

January 15 anogo sentong ya pastor, Yikhum Baptist Church R. Zanbemo Kithan-i Tsüngrem temaotsü meshia sarasadem tenzük aser iba sülen Sr.pastor, Kohima Lotha Baptist Church Rev. Dr. Benry Lotha lenisüba nung asürtem

bilemtetba sarasadem sentong agia liasü.

Kasa mapang nung Deputy Chief Minister Y.Patton-i yimdaklirtem den Jubilee mung salem lemsatepa liasü. O jembiba mapang Patton-i, "mezümpur kari timtem tekangshi arem inyakba ajanga Arogo iba alizüng tongtetogo anungji parnok i bendanga agüja inyakba amajok mekümdaktsütsü atema asenok taküm libalirotsüla," ta ashi.

Paisa, sentepa aliba lokti dang, Jubilee ya taitoktepba aser

longjemshiba mapang ka lir ta shia parnok dang tesüiba mapangtem amatoker yimjung aser tesunep nem yimsüsüdaktsütsü ayongzük.

Maneni Dy.CM-i, pa-a New Changsu village anükapang ka asüba atema pelaba lemsatepba den pa dang temeim sayuba atema kanga pelaba lemsatep aser Jubilee amungba temaotsü kija aser kibongshiai ajangshitsü imlaja ataba lemsatepa liasü.

Sentong nung tongi o jembir LBCA Executive Secretary, Rev. Dr Ezamo Murry-i, Yisu Khrista tesangwa ajanga dang asen taküm melenshidaktsütetsü ta ashi. Pai "Let the light of Christ bring change in your life" onük nung ajemdaker jembia liasü.

Maneni sentong nung Jubilee Choir aser Changsu Yanthan Wokha Town Eloe Okho-i ken tajung tena liasü. Pastor, Longsa Baptist Church Rev. L. K Tsanglao-i yimtsüng aser Arogo atema temaotsü meshia sarasademtsü aser pastor Pangti Baptist Church Rev. Monglio Ngullie-i tenüngsang agütsü sarasadem agia liasü.

Phek nung Sükrünye benjung mungogo



Dimapur, Aenjeti/January 15 (TYO): Phek District Hq. local ground nung January 14 nü Sükrünye bejung lapokba sentong agiogo. Sükrünye benjung ya Chakhesang nung atema tongtibang benjung ka lir.

Benjung lapokba sentong nung NPF legislature party lenir aser MLA Kuzholuzo Azo Nienu alakteta jaoker liasü.

Sentong nung Azo Neinu-i Nagaland sorkar tenüng nung Chakhesang nunger ajak den Sükrünye benjung salem lemsatep aser benjung kanga meraketa ayongzüka amungba atema Phek Town Youth Society aser Nehru Yuva Kendra Phek nem tenüngsang agüja liasü.

Paisa, benjung amungba nükjidong lemsatep aser ashiba agi, Sükrünye benjung ya shi aser tanüla asüngsashiba benjung ka lir aser yimtsüng ajunga shi aser tanüla merekteta temeshiba akümstsü aser Nagaland nung aliba kintem ajak yongtsü nung telongjem adokdaktsütsü aser temaotsü

bener arutsütsü merangtsülatata ashi.

Pai Khristan ka ama pei shi aser tanüla merektetsü, taoba mapang inyakyimtem atema taitoktepba amatoktsü aser Naga nungertem tesendaktep tali akangshitsü ayongzüka liasü.

Kasa mapang nung Phek Town Public Forum tir Khosapa Venu-i Sükrünye benjung salem lemsatep, Associate Pastor PTBC, Dr. Vezhoto Soho-i tsüngrem temaotsü meshizüka sarasadem aser Vepasa Venuh'er teloki ken ka tena liasü.

Maneni benjung amungba anogo tetsütebou mapang mi apuba yimya agi mi aputeta Sükrünye milen tsüklokba, mezüng kangtepba, lijak kashishiba, karatsüng asemtepba, au nung totzü melanga yur sua ataba amala sobaliba asaya balala asaya liasü.

District Hq nung office tekolaktem ajak Sükrünye benjung lapokba sentong nung shilem agia liasü.

Assam Rifles-i sentong balala ayongzüka agi



Dimapur, Aenjeti/January 15 (TYO): HQ IGAR(North) tawabangba kübok Assam Rifles Shamatore Battalion-i ayongzüka Noklak District nungi aluyimertem hopta ka atema Agriculture University Johrat, Assam semdangtsü asoshi anir oa liasü.

Iba sentong ya January 14 nü Commander 7 Sector Assam Rifles, Brigadier Vikram Singh-i Tuensang nungi tembangdakja liasü. Commander 7 Sector Assam Rifles Brigadier Vikram Singh-i, Nagaland nung district tasentiba Noklak nungi aluyimertem Agriculture University semdangtsü atema yoktsü asoshi sentong tajung yangluba atema Battalion nem tenüngsang agüja liasü.

Paisa, Noklak district nung aliba aluyimertem dang iba sentong ya teti agiba sentong ka

kümdaktsütsü nangzük, kechiyong iba ajanga aluyimertemi tanü asüng aluyimba tasa angazüktsü aser iba ajanga parnok i tsünüsenpongtsü timba adokdaktsütetsü, ta ashi.

Maneni pai aluyimertem dang parnok i angazükbatem pei yimtsüng aser temeket nung aliba aluyimertem den lemsateptsü ajungshia liasü.

Iba tour ya January 6 nü tenzük aser January 14 nü tembanga liasü. Tour mapang aluyimertemi Kaziranga National Park semdanga liasü, koba parnok i ajaki kanga pelashishia agizükogogo. HQ 7 Sector commander-i aluyimertem ajak nem tetushi agütsüba sülen sentong tembanga liasü.

Kasa mapang nung Assam Rifles Mon Battalion-i, Mon

District kübok Nokyan yimtsüng nung alir arishi küm 6 tanur ka nem January 15 nü mozü agüja teyari agütsüogo.

Nokyan yimtsüng nung arishi küm 6 tain Nehnyem Konyak dak Air Gun ka agi aibelena tenütsü nung khalokja liasü. Jongdak teyari nungdakba angateta Assam Rifles-i tanur taküm kümzüktsü atema mozü teyari agüja liasü.

Yimtsüng nung civil hospital mali, anungji yimdaklirtem medical emergency ajak atema AR post dak dang metaloker alir. Tanobusang ya lendong nungibo jenbogo aser Nokyan kübok Assam Rifles Camp nung temang anepaludar.

Assam Rifles-i tanobusang kümzüktsü atema mapang shidak nung teyari agütsüba asoshi yimdaklirtemi parnok dang kanga pelaba lemsatepogo.

75buba Army Day mungogo



Kohima, Aenjeti/January 15 (TYO): January 15 nü linük ajunga den jangyumedema Nagaland lanur team ka aser Assam Rifles na longjemmer Saramati tenem nung linük wako, Indian Army wako aser Assam Rifles Wako atsüketa 75buba Army Day mungogo.

Nagaland kübok tesem balala nungi tetsür ana densema lanur 17 den Assam Rifles 38th Battalion nungi Riflewomen ana densema sepai 31 Saramati tenemi ataba nung shilem agia

liasü. Iba sentong ya January 10 nü tenzük.

Saramati tenem ya India & Myanmar arrtsü nung Kiphire District kübok Thanamir yimtsüng anasa lir. Iba tenem ya 3,826 m talang aser Southeast Asia nung tenemtem rongnung tongtibang ka lir.

Lanurtemi mepeshiba ama Inspector General of Assam Riles (North) tawabangba kübok Assam Rifles-i iba sentong ayongzüka agitsü atema sentong yanglua liasü.

Angh-i Tsungkamneo benjung salem lemsatep

Dimapur, Aenjeti/January 15 (TYO): Nagaland aser Assam Angh Prof. Jagdish Mukhi-i sangdong ka ajanga Nagaland nung aliba nüburtem aser talisa Yimkhuing nungertem den Tsungkamneo benjung salem lemsatepogo.

Iba benjung ajanga telongjem tali adokdaktsür, kati ka den tai tokteper aser yimjung tali ajungketba den medemertem tsüngda tesendaktep tajungba

küma yanglushir. Iba ya benjung ya kidanger yimtsüngtem den temeim aser yimjung benjungba mapang ka aser akangjungshitepba mapa lir.

Benjung amungba mapang ajak tekümzükba kübok pelatepa amungtsü imlaja atar. Tsüngremi Nagaland moajang, ta Angh-isa ashi.

Kasa mapan nung NSCN/GPRN-i 'Yimkhuing aser Kuki nungertem den 'Tsungkamneo

asir Mimkut benjung salem lemsatepogo.

Benjung anaprongla nung inyakyim balala, tsüngsang, kentenba, benjungtepba aser sobaliba sentong balala sendaka lir.

Putu tasen kati ayaoka aiba mapang Yimkhuing aser Kuki nungertem ya maneni Naga nunger yongtsü nung yimjung asoshi inyaker kaka akümstsü imlaja atar, ta kasa sangdong ajanga metetdaktsü.



January 15, 2023 nü Secunderabad nung Vande Bharat Express train tenzüksüba sentong nung Railways Minister, Ashwini Vaishnaw adenba noksa nung angur. Ato kilonser Narendra Modi-i video conferencing ajanga iba train tenzüksü. Iba train ya Secunderabad nungi Visakhapatnam tashi senzüksü.

Remote Voting Machine atema EC-i party ajak senden ayonger

New Delhi, Aenjeti/January 15 (Agencies): Election Commission-i January 16, 2023 nü national party ajak nungi chairpersons, presidents aser general secretaries senden ayongzükogo; iba senden nungji Remote Voting Machine sayatsü aser iba atemaji o lemteptsü, ta ketdangsertem osang ka ajanga metetdaksü. Linük nung tesem balalai oa aayanger/mapa inyakertemi vote agütsütetsü atema yaküm December ita tatembanglen Election Commission of India (ECI)-i prototype Multi-Constituency Remote Electronic Voting Machine (RVM) indang osang metetdakja liasü. RVM ji ajanga linük tesem balala nung oa mapa inyakertemi remote polling

stations nungi vote agütsütetsü. Election Commission-i, vote agütsüba rate kanga ajemba kuli rongnung tongtiji, linük tesem balala nung oa aayangertemi vote magütsütetba ajanga lir, ta metetdakja liasü. RVM ji ajanga tesem balala nung oa aayangertemi vote agütsütsü atema pei district-i aotsü menüngdaksü, ta EC-i metetdaksü. Election Commission-i iba senden nungji adentsü atema recognised national party 8 denji külemi regional party 57 jaokogo. Senden nungji EC indang Technical Expert Committee-i prototype Remote EVM ji amshia sayutsü. Election Commission-isa recognised national party tem dang RVM dak sendakba nung January 31 tashi nung pei

tebilemba lemsatepang, ta metetdakja lir. Multi-constituency EVM ji gol ka dang asütsü aser connectivity kecha malitsü. "Technology ainba putu ka nung tesem balalai oa alirtem nem vote agütsüba temeden magütsütetbaji tim masü. 2019 küm General Elections nung voters shilem 67.4-i dang vote agüja liasü aser vote agütsütsü temsüa alir crore 30 dak temai pei vote temeden mamshitetba atema Election Commission of India-i tebilemstü akar," ta EC-i metetdaksü. Voter kati tesem tasen ka nung vote agütsütsü atema register masüba kuli aika lir, aser ibaji ajanga pei vote temeden mamshiteter, ta EC-i metetdaksü.

Nepal nung tsükokba tayimtsü nung India nungera 5 liasü

Kathmandu, January 15 (Agencies): Amongnü Nepal nung nisung 72 mener tsükokba passenger tayimtsü nung India nungera parnok pongu liasü; iba lendong nung tang tashi nung nisung 68 asüba jangjaogo. Lendong atalokba sülen Nepal yimtiba, Kathmandu nung aliba Indian Embassy-i helpline numbers sangdonga ketdangsertem den tongtepratepa tensa asadangdar. Indian Embassy-i sangdongba Helpline numbers ji 1. Kathmandu: Diwakar Sharma: +977-9851107021 aser Pokhara: Lt Col Shashank

Tripathi: +977-9856037699 lir. Yeti Airlines indang ATR 72 tayimtsüji anepdang 10:33 ako nung Kathmandu nungi Pokhara-i apusoa liasü aser Pokhara atongtsü minute pongu shi dang lia Nayagaun nung tsükok. Nepal sorkari Hombarnü linük nüburtemi mangyimtsü sangdongba den külemi iba lendong atalokba kuli bushitsü atema züngsem pongui akümba team ka tentetogo. Iba lendong nung bendanger 15 aser tanur trok asü. Tayimtsü nungji Nepali nung 53, India nung pongu, Russia nung pezü, Korea nung

ana, Argentina nung ka, Ireland, Australia aser France nungera kaka liasü. Pokhara airport atongtsü mapang tatsüka dang lia Seti ayongküm nung tayimtsüji tsükok. Kathmandu nungi Pokhara atongtsü atema minute 25 shi dang agir. India Union Civil Aviation Minister, Jyotiraditya Scindia-i tayimtsü lendong nung asürtem atema mangyim jashi lemsatepa twitter ajanga, "Nepal nung tayimtsü lendong nung nisung asüba ya kanga tia maka. Mangyimer kibongtem atema ni sarasademtsür," ta lemsatep.



January 15, 2023 nü Bengaluru nung aliba Govinda Swamy Parade Ground nung Army Day amongdang Army Engineers-i parade nung shilem agiba noksa nung angur.

Sepaitem ajanga India nung ajak nüma atanger: PM Modi

New Delhi, January 15 (Agencies): Amongnü Army Day anogomong nung ni Day anogomong nung Ato kilonser, Narendra Modi-i Indian Army nem tenüngsang agüja, mapang ajak nung sepaitemi lendong mapang nung parnoki nüburttem tenzükba ajanga sepaitem nükshir, ta ashi. 1949 küm Field Marshal KM Cariappa mezüngbuba Indian Army nung Indian Commander-in-Chief akümba nüngtem nung küm shia January 15 nü Army Day amonger.

Modi-i twitter ajanga, "Army Day anogomong nung ni sepaitem, sepaitem nungi anisüngzükter alirtem aser parnok kibongtem den salem lemsateper. Asen army atema India nung ajak nüma atanger aser mapang ajak nung sepaitem dang pelaa alitsü," ta lemsatep. "Parnoki mapang ajak nung asen linük kümzükba ayur aser lendong mapang nung parnoki linük tenzükba atema parnok kanga nükshir," ta paisa lemsatep.

LAC nung Defence tashi itta lir: General Manoj Pande

Bengaluru (Karnataka), January 15 (Agencies): Indian army-i Line of Actual Control (LAC) nung defence tashi itta ayur aser tensa balala atema renema dang lir, ta Amongnü Army tongti, General Manoj Pande-i metetdaksü. Bengaluru nung Army Day anogomong sentong nung jembidang General Manoj Pande-i, northern border region nung tesünep lir aser lateta aliba inyakim ajanga yimjung alitsü atema mera agia inyaker, ta metetdaksü.

Anüolen arrtsülen tensa dak sendakba nung pai, LOC nung ceasefire tezüngzüktep lir aser ceasefire ozüng alema inyakba kanga ajema kümogo, ajisüaka (Pakistan den) arrtsülen kiralongra infrastructure tang tashi lir, ta metetdaksü. Jammu & Kashmir aser Punjab arrtsülen raraba hadir aser temesepba mozütem shibelena bener aittsü atema drones amshir, ajisüaka itemji nokdangtsü atema asen sepaitemia drones amshidar, ta General Pande-isa metetdaksü.

Elections nung BSP-i tangar den meloktepi tokteptsü: Mayawati



Lucknow, January 15, 2023: Bahujan Samaj Party (BSP) tongti aser taoba mapang Uttar Pradesh Chief Minister, Mayawati-i la asoba anogomong nung osangbenertem den jembidang tangokba noksa nung angur. Amongnü la arrshi küm 67 jungogo.

Lucknow, January 15 (Agencies): Amongnü BSP tongti aser taoba mapang Uttar Pradesh Chief Minister Mayawati-i, state balala nung assembly elections aser 2024 küm Lok Sabha election nung BSP-i tanga party den meloktepi tokteptsü, ta metetdaksü. Taküm Karnataka, Madhya Pradesh, Rajasthan, Chhattisgarh aser Telangana state tem nung assembly elections agitsü lia osangbenertem den jembidang lai iba osang metetdaksü. Amongnü la arrshi küm 67 ajungba anogomong nung Lucknow nung osangbenertem den jembidang lai, "Karnataka, Madhya Pradesh, Chhattisgarh aser Rajasthan assembly elections aser sangküm Lok

Sabha elections nung BSP-i party shinga den-a melokteptsü, ta ni züngpong ashir. Ozü party-i elections nung kija tashi agi tokteptsü," ta metetdaksü. Mayawati-i, lai iba sangdong agütsütsüsa akümer, kechiyong Congress den tanga party kari parnoki BSP den lokteptsü amai jembidar, ta ashi. "Tamalen Punjab dak alaka Uttar Pradesh aser tanga state kar nung state level nung khenanaben tangar loktepeba mapang parnok (teloktep party tem) indang votes ji onok dangi transfer masü, ibaji ajanga BSP takoksa angü," ta lai ashi. "Anungji ozü party-i assembly elections aser Lok Sabha elections nung tangar den meloktepi tokteptsü telemtetba agiogo," ta laisa metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, AENJETI (JANUARY) 16, 2022

Naga nunger tejakleni aoer

Tawa NSCN telok ka rongnungbo mangatettep adoka pilar ama angashidang, tang ano yakanüang Forum for Naga Reconciliation (FNR) teloki tanen makai Naga nunger telongjem aser yimjung asoshi inyakba ajanga Nagaland Socialist Council of Nagalim (NSCN-IM) aser Naga National Working Groups (NNPGs) na longjemdaksür akümba, Council of Naga Relationship and Cooperation purtem ajurutepdakja Naga nunger yimten timi latettsü asoshi nangzükshidaksüba osangji, atangji, Naga nunger telemtetba kati arutsü asoshi tejakleni aoba mapa ka asütsü. Joko, Naga nunger lanurtemibo Naga yimten tebilemstsü ya mali amai bilemer, anungji parnokibo Naga yimten temeten otsü jembiba ya kecha hau ta mali kümogo. Ibaji Naga nunger taintem, talisa linük tenzükba mapa nung alirtem, asoshi kanga tebilemdangtsü aser tekümdangtsü mapang ka asütsü. Alima nung koba kin südirsüaka pei yimten temeten lir, anungji iba otsüji putu ka nungi putu ka ta melentepa pei lima tsürabur senmang amai mulung nung rezünger aser jembiba aoer. Ajisüaka, asenok Naga nunger asoshibo mekümdangra, Naga yimten temeten otsü ya taruba putu nungbo lanurtemi mejembitsü, kechiyong parnoki Naga yimten otsü ya yimten nüchiso bushiba otsü masü saka rongsen bushiba otsü amai repranger. Iba ama tangatetba tasen lanurtem mulungjang nung aliba jagi Naga yimten temeten otsü ya memenen dang, asenok yimten ait nung alir taintemi yaktasa Naga yimten tebilemstsü onük ya tembangadoktsüla. Asenoki shitakba alima yimya nung bilemdangdi süra, tang NSCN-IM aser NNPGs nung tongti lenirtem ajak ya kanga tain kümogo, anungji temang agi kuma aika linüyonga memelatsü. Ibaji kodang bilemdangdir, parnok sülen lanurtemibo ano tang dang nungi tebenjaba benjakdaksütsü aser tebilemstsü tembangtsü melen tuluba kümdaksütsü amai reprangtetter. Ashiko, tanü inyaker taintem alidang ya, FNR teloki yaria akümba Council for Naga Relationship and Cooperation ajanga Naga yimten tebilemstsü ya tatem kuma melatettetra, 2030 tashi nungbo Naga nunger telongpur teloktemang tang dang nungi teimba kümer alitsüa akok. Aji oda, Naga yimten tebilemstsü ya teti atema tatem kuma melatetyonga, tanü tensa dak apet tanü lanurtemi aginüba jenjang ka nung Naga yimten latettsü asoshibo kangabo tasak masütsü amai bilemer. Ochi o kaji, tanübo Naga yimten nüchiso bushirtemia India den tangatettep nung külemi linüba ken o jembir, anungji India nungsa süaka Naga kin ya balakata ta asütsü atema yimten tamaisü ka danga agütsütetetra, iba jagi Naga yimten tebilemstsü ya kokadoktsü. Naga nunger taginübaji Naga nunger ya India nungsa süaka tangar india nunger amato masü balakata ta asütsü atema yimten tamaisü aser temeten ka aginür, anungji ajibo India-ia agütsütettsüla. Joko, Naga yimten tebilemstsü melatetteti Cease Fire Designated camps nung dang lia tantsür tambur akümer aser semchirsemnur arur, ibaji tepelatsü osang masü, tebilemstsü osang ka lir. Atangji, Naga yimten melatetteti aruba takoksa ya Naga nungertem asoshi dang masü saka India nungertem asoshia takoksa tulu lir. Itemji meteta, tangbo India nung yimten teloktemia election agitsü maritepi tamasa Naga yimten onük nung ya jungjunga bilemdanger telemtetba agitsüla. Khen ashitsübo, Nagaland ya India asoshi alinüka kanga tilaka dang aser nütsünga ishika dang, anungji kangabo menüngdak amai. Aji oda, election aginunga Delhi nungi sen tali meshitsüba dak alaka Nagaland nungi angutsüsa kecha maka. Tatar senden nung vote nüngdak danga tatar ana dang, anungji India asoshi Nagaland nungbo election magiang tajungba amai bilemer. Ajisüaka, linük ka asoshi kecha maka rüjep dang asüyonga, iba tenemjia nüngdaker, iba jagi Kashmir len asüyonga aser Naga lima asüyonga India-i kanga temulung agüja anüker. Atangji, Naga yimten tebilemstsü aser Nagaland election otsü yabo toktsür, ano asenok asoshi tang tang atemabo Frontier Nagaland onüka ya-ang tuluba kümogo. Aji oda, Frontier Nagaland state balaka kümtet nungbo, Nagaland state ya tilaba akümba dang masü saka International boundary maliba state kakümadoktsü. Item ama temelenshi jagi asenok Naga yimten jenjang tamajungba mekümdaksütsü ajaki bilema inyaksüla.

OLEMSABANG

" ELECTION YIMYIM "

~ L. Kika Pongener.

Oh... Election, ozü Naga nunger tulur-tilar, takar-sensaker ajaki na yongyar, Yimsusur-ia yongyar, kijung lanur-ia yongyar aser aiur-asangur-ia yongyar, Arogo tenzükertem, Putirtem, laishirtem aser arogopurtem ajungai yongyar, Ozü Naga nungerbo rongsen aser supokrem matsüngdang shinga mejenpur.

Oh... Election, nai küm pongu shia ozü Naga lima raksatsür aser lemsatsür, Nai yimden, arogo aser loktiliba ajak nung teraksa aser telemsa adokdaksür, Nai kin-kidong, meposanger, yimtsür-yimer tsüngda meputep adokdaksür, Nai tsürabur, adianu aser pur-medemer tsüngda nunga tsükchitep dendaksür.

Oh... Election, nai ozü Naga lima nubur Sodom Gomora lima ama menentsür, Kodang na arudir, nai teti temesepba chiyungtsü yi, drugs taluposa bener arur, Kong na lidir idakji teti chidiyungdi, japoari, nuktapangda mapa agi sunga lir, Na alidak teti rongrong, raratep, mangatettep aser mepetmesu agi sunga alitsü.

Oh... Election, nai ozü Naga nunger senyong pei temeden ayoktsü ajungshir, Esau-i aya marem nung chi auso ka yong pei tambu senmang yoka achiba ama, Posu-i aya marem nung pei techanu dena yoka achitsü apayua mebilemba ama, Ozü Naga nungeri tanü poksung sen ishika mechi pei temeden vote yoka achir.

Oh... Election, na kodang arur ozü lima nung azü tokshiba mapa aika ataloker, Kain-i tenu Abel tepsettsü mapayuba ama adianui pei adianu tepsettsü mapayur, Ozü limai na arur külen tashitemeteter kenshi-oshir senso tajung aika tepsetogo, Ozü lanur tajung, lennir tajung, yimsusur tajung aika dang leper nung rema lir.

Oh... Election, nai ozü sorkar tenzükertema dena ochimashi inyaksü ajungshir, Nubur meyong rongsen agi pei nuja meyong kümer agitsü temulung uludaksür, Nai ozü lima nung terenlok mapatem aika meinyaki anena ayutsüsa kümdaksür, Ozü lima terenlok inyaksüba sen agi vote alitsüba mapa nungang amshidaksür.

Oh... Election, na marudang ozü lima iba amai teraksa aser tepenja makai liasü, Ozü Naga nunger ochishir yimden yimsusur aser lokti lennirtem aika dang liasü, Pei asoshi mebilemer, pei ajungtsü mebushir, nubur meimba yimsusur aika liasü, Saka na arur külen item yimsusur aser lennir tajungtem ajunga nai raksatsüogo.

Oh... Election, nai ozü Naga lima yimsusuba bangdak sabanga dena meyipsatsü, Nai ozü yimsusur sen agi tebang nembangtsü aser supokrem agi tenük pokdaksü, Tsüngrem lar dena Election kangla nung asonger ochi poküm nung menokdaktet, Khristar arogo-a dena Election shisa-rama tzüchi nung asonger ochi ola madoktet.

Oh... Election, Ozü Naga nungeri ozü Naga limaji 'Dry State' ta yimyim ayim, Saka nai iba yimyimji ali tur remtsüogo, amajok aser tamakitsü kümdaksüogo, Kechiyung kodang na arudir alima kinuk-kisang ajaklen 'Yi Bottle' agi asünger, Ozü lima Khristan lima agi Hindu-Muslim lima danga tamajungba kümdaksür.

Oh... Election, ABAM & NBCC-i anir, Election meruka agitsü yimyim ayimer, Joko ozü Naga lima yanglushitsüba nutsüng-nubur ajaki mulungteter ola adoker, 2023 küm Election nungbo ochishia merukmeruka agitsü pangzünga renemteper, Naga nunger ajunga kenpang-opang ka sur 'Clean Election' yimyim ayimoktsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Congo nung Tenla kidang bomb lendong nung nisung 5 asü



Bomb lendong nung yirurtem gari nung aniketba mapang tangokba noksa nung angur.

January 15, 2023: Amongnü (January 15, 2023) Democratic Republic of the Congo (DRC) nung Tenla kidang baptiba tekülem sentong tagidak mapang nung bomb tesashi ka apokba lendong nung nisung pongu asü aser aika yiruogo; iba lendong ya North Kivu nung aliba Kasindi Lubiriha Tenla kidang atalok.

Congo army-i, iba lendong ya Pentecost Arogo ka nung atalok, ta metetdaksü. Kasinda jila nung aliba Tenla kidang pokdaksüba bomb ji Improvised Explosive Device (IED) liasü ta jangjaogo. Kasinda jila nung tang mezüing iba ama lendong ya ataloker. Osang angazükba agi, nisung ka arua IED pokdaksüba sülen

aremleni jena ao. Iba area nungji Islamic State den affiliate süa aliba Allied Democratic Forces telok kanga yakyaka lir, ajisüaka tang tashi nungbo iba lendong ya shirnoki agütsüar mejangja. Kasindi jila ya Congo aser Uganda sepaitem longjemer ADF anema rara tenzükba province kübok lir.

Myanmar nung sepaitemi Tenla ki amakdang nisung 5 asü

Bangkok, January 15 (Agencies): Myanmar nung sepaitemi anünglen nungi bomb amshia Karen state kübok yim ana amakdang Tenla ki ana raksatsü aser arrshi küm 2 tanur aser tetsü na densema nisung pongu süogo, ta relief organization anati metetdaksü. Brihostibarnü (January 12, 2023) sepaitemi amakdang asürtem rongnung Baptist Arogo ka nung pastor ka, Catholic Arogo ka nung deacon ka aser Arogo lenir ka densema asü, ta Karen Women's Organization aser Free Burma

Rangers nati metetdaksü. Ano tanga yim ka nungji sepaitemi amakdang tetsür ka aser lar jala na yiru. Karen ya Myanmar anüdoklen Thailand den arrtsülen lir aser iba tesem nung Khristan nütsüing aika lir. Yangi lisopur telungpurtemi Centre sorkar dang nungi ketdang süba tashi meshia mapang talangka raraan arudar. 2021 küm February ita nung sepaitemi Aung San Suu Kyi-i aniba democracy sorkar atsüngdokba mapang nungi tenzüka telungpurtemi ano

asentenshir sepaitem den tesashiba raradar. Karen Women's Organization-i sangdong ka ajanga, "Sepaitemi anünglen nungi amakba ajanga civilian aika asür, ki raksatsür, medical centers, Tenla kitem, schools, kaketnang aser monasteries raksatsür," ta metetdaksü. Tan hopta telungpur telok-National Unity Government-i sangdong ka ajanga, "Sepaitemi tanen makai amakba ajanga tanur teimba sür tai maket civilian 460 süogo," ta metetdakja liasü.

Sri Lanka nung Arogoi Supreme Court dang pelaba lemsatep

Colombo, January 15, 2023 (Agencies): 2019 küm Sri Lanka nung Easter Sunday anogo nung bomb amshia Tenla ki asem den hotel asem amakba lendong nung nisung 260 dak tema asüba ken o nung Supreme Court-i taoba mapang linük Tir aser ketdangser pezü dang, iba lendong nung takoksa angurtem nem temenok agüjang, ta tuyuba atema Sri Lanka nung Catholic Arogoi Supreme Court dang pelaba lemsatepogo. 2019 küm Easter Sunday nü bomb amshia amakdang takoksa angur aser asür kibongtemi, security tashi maitba ajanga iba lendong ya atalok, ta shia ken o benoka liasü. Osangbenertem den jembidang Cardinal Malcolm Ranjith-i, iba ken o nung taoba

mapang Tir, Maithripala Sirisena aser pa kübok tongti security ketdangsertem anema ano ken o tesashiba akatsü imlar, ta metetdaksü. "Iba obendang nung ajemdaker ano iba ken o nung terenlok akatsü onoki (Arogoi) imlar. Ochi ajak jungkai adokba mapang nungang takoksa angur ajak nem temeden agütsütettsü. Iba telemtetba (SC tetuyuba) ya iba ken o nung alizüing ka atongba dang lir," ta pai ashi. Brihostibarnü Supreme Court-i Sirisena den pa kübok police tongti, intelligence ketdangser ana aser defence ministry nung tongti ketdangsertem dang, bomb lendong nung takoksa angur kibongtem nem senotsü temenok sen million 310 (dollar sen 850,000) agüjang, ta tuyuogo.

Supreme Court-isa, taoba Tir aser pa kübok ketdangsertem bomb lendong menokdangteti liasü; iba lendong ya Sri Lanka nung otsü nung lendong tamajungtibatem rongnung densema lir, ta metetdaksü. 2019 küm Easter Sunday nü iba lendong nung raliwalirtema aika asü aser Khristan teimba ser nisung 500 dak tema yirua liasü. Yaküm November ita nung Sri Lanka-i iba ken o dak sendakba nung nisung 24 anema ken o angadang aser Police-i melung malemertem anema ken o 23,000 benoka liasü. Ketdangsertem ashiba agi, iba lendong agütsütsü atema asalentong yanglur tongtiji Mohammad Naufer lir aser pa ya Islamic State den tesendaktep lir.

ANO GO ABEN TSÜNGREM DEN

Tenangzükba asemsü T.ken 62: 1-12

Tekong 2,5 aser 12 nungji asenoki ataa aliba nung yaritsü asoshi tenangzükba asemsü agüja lir: Tsüngrem asenok Tekümtet. Tsüngrem asenok Teimla. Tsüngrem asenok Timsür. Item asemji asenoki shisadangi.

Tsüngrem asenok Tekümtet. Dawidi temenen nungi kümzükba indang masü lendong nungi kümzükba indang jembi. "Paji dang kü lung aser kü tekümtet, pa kü mitsa takang, ni kodanga marakzütsü" (t.2). Yimya ama Dawid tsükchirtemi pa arishia liasü. Sauli pa tepsettsü meranga liasü. Aji saka Dawidi ashi, "Ni Kibuba dang ataa alitsü. Ni kü sasa mazüoki jenshia malitsü. Ni Kibuba dang ataa alitsü kechiaser Tekümtet Pa nungi arur." Tanüa ibaji ochi. Asenok lendong lima nung alir. Asen meketa kinük nung kechi ataloker asenoki memetet, saka asenok Tsüngrem asenok lung aser Jenokdak tenangzükba kar.

Tsüngrem asenok teimla. Ne teimla nai kong repranger? Ne sasa dak, ne senpong, ne bank, ne tembartem? Ne tarutsü mejangja aser ammag asü dang nai kong repranger? Dawidi Tsüngrem dak reprang. "Kü nela, nai Tsüngrem dak anisüngzükang; kechiaser kü teimla pa nungi lir" (t.5) Tsüngrem asenok Timsür. Iba yagi asenok o bendanger masü saka kulisürtem lir ta angatetdaksüba nung tulu ka yarir. Asenok yangi asenok sasa timsüa malir. Asenok timsüba Tsüngrem nungi arur, "Tsüngremi nisung shia nem pei mapa yari agütsütsü" (Rom 2:6). Tanü nai timtem ajurura, Kibuba dang ataaang. Pa nungi ne tekümtet, ne teimla aser ne timsüba arur.

Timtem mapang nung telangzüba mangudang nai kwiben ne sasa dak mesüra tangar dak repranger? Nai Tsüngrem dak reprangang, Pa nungi telangzüba ataaang. Tsüngrem tama südakjang aser Pai na asoshi inyaktsü ataa liang.

Jesus Calls Nagaland Prayer Festival nung adentsü jaoker

Dimapur, Aenjeti/January 15 (TYO): January 28-29 26 nungi tenzüka anogo asemnü atema renema lir. anogotem nung Dr. Paul Chennai nungi Dr. Paul Dhinakaran aser par kibong Dhinakaran aser par kibong Agri Expo Ground, 4th mile, den Tsüngrem lartemi iba Diphupar, Chumukedima, sentong nung adenertem Dimapur-i arua nikongdang melungjang nung kongshitsü 4:00 ako nungi Tsüngrem O aser tanela nung temoatsü lemsateptsü aser shirangertem angutsü, anungji iba sentong aneptsütsü, ta sentong nung ajak adentsü jaoker, ta tayongertem osang ka ajanga tayongertem metetdaksü.

Iba sentong nung adentsü atema jelia registration agitsüla; registration atema den külemi Western Sümi registration atema Baptist Akukuhou Küqhakulu tatembangbuba anogoji January (WSBAK)-i senteper 20 asütsü. Tanenzüktsü atema ayongzük. facility angutsü aser jengang dalang asütsü, anungji registration atema 6380752290

Jesus Calls Prayer conference nungji Dr. Paul Dhinakaran ajanga tongteprateptsü akok. aser par kibongi sarasadem Tsüngrem O jembirtemi tashi amshia shirangertem English oshi nung jembitsü aneptsütsü, Khrista alimai aser ibaji Nagamese aser Hindi tanaben arutsü aliba atema oshi naprongla nung nüburtem reneptsütsü aser meyipzüktsütsü. Osang tejangja atema ajungshitsü. 9360904051/8826340055

Iba conference ya January ajanga metetpelatsü akok.

AO OSHI ANGAZÜKDAK: TANÜ ANGAZÜKTSÜBA OJANG



Onsara

(adj) kanga tali (too much / many)


* Tetsüi par jala onsara meimba agi taküm raksadaksü.

Onset

(v) lung agi ona südaksü (stone to death)

* Kin karibo aibelenertem lung agi onseta südaksür.

OLONG PAITEP # 6401



TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S _ _ _ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong talemangtiiba - (5)
17. Meputep - (5)

LANGTSÜNGLEN

- 1. Tenuk telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6400 TELANGZÜBA


TIPIEN :

- 2. Bangsemo, 6. Tiptem, 8. Jen,
9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Airtel-i Meghalaya yimtiba Shillong nung 5G service tenzüker



Airtel-i Meghalaya yimtiba Shillong nung 5G service tenzükdang tangokba noksa angur

Shillong, January 15, 2023

(Agencies): Meghalaya nung Airtel-i 5G network tenzüker. Airtel 5G Plus services ya shilem lemsar agütsütsü.

Tang iba network ya Laitumukhrah, Lapalang, Nongrah, Governor House, Lummawbah, Jaiaw Laitdom, Pines colony (Laban Red Cross), Mawpat, Riat Sohkhur

asertesem kar nung angutsü.

"Northeast nung 5G mezüng tenzükbaji Airtel lir. Shillong nung 5G tashi ajangshitsü tenzüker atema onok kanga pelar. 5G ajanga Meghalaya nung alirtem ajangzütsü imlar" ta Chief Minister Conrad K Sangma-i ashi.

Airtel-i Meghalaya nung digital connectivity tajungba

kümdaksütsü aser iba ajanga nübertem taküm nung tajangzüker aika angutsü imlar ta company-i metetdaksü.

India nung 5G technology amshitsü tenzüker mapang Airtel 5G NW ajang healthcare, smart agriculture, logistics aser tanga wadang aika asoshi 5G network tenzüker.

Tripura nung Congress aser CPI-M tsüngda menden lemsatsü akok

Agartala, January 15, 2023

(Agencies): Tripura nung CPI-M aser Congress külemi yaritepa Assembly elections nung tokteptsü jembitepogo.

Congress Tripura in-charge Ajay Kumar den state general secretary Prashanta Bhattacharjee nati Agartala nung CPI-M Tripura state headquarters semdang aser idangji Left lenirtem den senden ka amen.

Iba senden nung CPI-M Tripura state secretary Jitendra Chowdhury-i anir Left lenirtem aden.

Congress-i Tripura nung 'anti-BJP parties' külemi

lokteptsü atema ayongzüker arur, ta Ajay Kumar-i ashi.

"Tripura nung mapa nungdaker aser tetsübu o ozüng alema inyaksangshiba nungi nüjiso nungdaker. BJP sorkar ya atsüngdoksüla" ta pai osangbener dang ashi.

CPI-M Central Committee Chowdhury-ia senden nung jembiba kecha mashi saka "Congress lenirtem den menden lemsateptsüba onük tenzüker aser maneni tarutsü nunga sendentem amentsü" ta ashi.

"Taruba Tripura assembly elections nung BJP tamakok ngudaksütsü atema ozü teloki

Congress aser TIPRA (Tiphaha Indigenous Progressive Regional Alliance) den menden lemsateptsü mulunga lir" ta Bodbarnü CPI-M General Secretary Sitaram Yechury-i ashi.

"Tongtipangba alizüngji assembly elections nung BJP nem tamakok ngudaksütsüba lir. Iba jagi alternative secular aser democratic front ka tentetsü nungdaker" ta paisa ashi.

Tripura den Meghalaya aser Nagaland nung taküm February ita assembly elections agitsü lir.

Manipur nung Operation Drones ajang poppy alu raksatsütsü

Imphal, January 14, 2023

(Agencies): Manipur Chief Minister N Biren Singh-i Honibarnü "Operation drones" takok ngua agiogo. Iba ya drones indang flight tests aser demonstration liasü.

Item drones ajang herbicides agütsüteter aser sorkar indang War on Drugs campaign nung amshitsü atema lir, ta Biren Singh-i ashi.

Hokolbarnü CAF & PD Minister L Susindro Meitei-i anir ketdangürtemi helicopter nungi Churachandpur, Chandel

asertesem Kangpokpi district tem nung ozüng alema poppy plantations aika anguba sülen Manipur CM-i iba osang metetdaksü.

"State sorkari mozü shibelenba maparen tera nungi atsüdoktsü atema inyaker. Onoki poppy tong herbicides amshia südaksütsü atema lenmangtem bushir, kechiyong poppy tsünüba tesemtemji meta talang pilar lir aser tonga aotsü kanga tasak" ta CM Biren-i metetdaksü.

State sorkari iba mapa nung

Rs 5712 crores tashi Externally Aided Projects (EAP) aser ano Rs 9141 Crores endoktsü tebilemba lir, ta pai ashi.

Manipur nung helicopters aser drones ajang arem mita reprangtsü aser poppy tsünüba aliba tesemtem raksatsütsü, ta Biren-isa shisem.

Nisung kari dang atem nung poppy lu ayimtsü atema tesem merüktetba putetra ozüng tapet agi merenshiang ta CM Biren-i police aser forest department nem tetuyuba agütsü.

Nagaon nung taila sen menünga amshirtem apu

Nagaon, January 15, 2023

(Agencies): Nagaon Police-i Horagaon nung taila sen amshir nisung asem apu.

Osang tejangja ka angazükba sülen Kampur Police Station nungi police telok kati Nagaon kübok Horagaon nung mita aodang nisung 3 apu.

Parnok ket nung taila Indian currency notes (FICN) 12 (Rs 500 denomination) aser A4-

sized paper bundle ka aser taila FICN printing machine ka apu.

Par asem ya Anarul Ali, Sahab Uddin aser Najarul Ali nunger ta jangjaogo aser Lakhimpur nung alir. Iba atema bushisüngdang ka tenzüker ta police-i ashi.

September 2022 nunga Assam Police-i Mangaldoi kübok Lengripara tesem nung taila sen menünga amshiba maparen ka makdoka liasü.

Iba mapang parnoki tetsür asem dena nisung 6 apu. Parnokji Zaman Hussain, Anwar Hussain, Syed Hussain, Rijuma Hussain, Joba Das aser Priya Rai nunger ta jangjaogo.

Lengripara nung parnok ket nungi taila Indian currency (Rs 2000 & Rs 500 denomination) lakhs aika apu aser currency minting machine ka angu.

Nepal nung tayimtsü katsükok; nisung 69 asü



Kathmandu, Aenjeti/January 15 (Agencies): Deobarnü Yeti Airlines indang tayimtsü ka nung nisung 72 mener Nepal nung Kaski district kübok Pokhara International Airport nung anenba mapang tsükoka nisung aika süogo. Osang agütsüba mapang tashi nung iba tayimtsü tsükokba lendong nung nisung 69 asüba sangdonger liasü.

Tayimtsü nung India nunger pongu, Russia nunger pezü, Ireland nunger ka aser South Korea nunger ana ta mener liasü. India nungertem ya Abhisekh Kushwaha, Bishal Sharma, Anil Kumar Rajbhar, Sonu Jaiswal aser Sanjaya Jaiswal ta jangjaogo, ta Yeti Airlines ketdangsür kati metetdaksü.

"Iba ya kanga tia maka tatalokba ka aser onoki asükhü lemsateper," ta Nepal dangi India Ambassador Shankar P Sharma-i ashi.

Civil Aviation Authority of Nepal (CAAN)-i ashiba agi, Yeti Airlines' 9N-ANC ATR-72 tayimtsü ya Kathmandu kübok

Tribhuvan International Airport nungi anepdang 10:33 ako nung apuso aser Pokhara airport nung 11:00 ako shi nung tsükoka liasü.

Tayimtsü nung passenger 68 aser crew members 4 mener liasü, ta Yeti Airlines otongdar kati jangjashitsüogo.

Tayimtsü tsükokba sülen Nepal Ato Kilonser Pushpa Kamal Dahal-i jongdak cabinet senden ka ayongzük aser tekümsükba maparen balala benoka inyaksü atema tetuyuba agütsüogo. Nepal sorkarisa iba tayimtsü tsükokba bushisüngdangtsü atema züngsem pongu agi kümtetba commission ka tentettsüogo.

Local television ajanga, tayimtsü tsükokba tesem nungi mi atokba aser tayimtsü ajar aliba meketa tekümsükertem aser nüburtem adenshir aliba sayuogo.

Tenük kuli agütsürtemi ashiba agi, tayimtsü ya anentsü merangba mapang anüngtom nung nai tenzük aser iba sülen tekolak tama ser ali nung alua tsükoka liasü.

Osang ajanga ashiba agi, iba

lendong atalokba sülen iba airport ya mapa tatsüka atema shibangogo. Pokhara ya Annapurna tenemtsüng nung awatsüng kümbang nung amenoka aliba raliwalir mongjen ka lir.

Nepal's Civil Aviation Authority-i otongdar Jagannath Niroula-i ashiba agi, tayimtsü tsükokba mapang nung tsüngsangbo junga dang liasü.

Nepal nung runways majungba aser tsüngsangmopung ajungbena melenshiba ajanga tayimtsü aiben tsükoka arudar.

2022 küm May ita Mustang district nung Tara Air tayimtsü ka tsükoka nisung 22 asü. 2018 küma Dhaka nungi apusoa aoba US-Bangla tayimtsü ka Kathmandu nung anentsü mapang mi adoka tsükok aser nisung 51 asü.

European Union-i Nepal nunger indang tayimtsütem parnok anüng nung ayimtsü memelar, kechiyong linük nung aviation industry indang training aser maintenance standards dak tashishitsü ket lir.

Britain-i Ukraine nem tank 14 aser tanga hadir agütsütsü

London, Aenjeti/January 15 (Agencies) : UK Ato Kilonser Rishi Sunak indang office sangdong ka ajanga Honibar aonung menor, Britian-i battle tank 14 den artillery teyari talila Ukraine nem agütsütsü ta metetdaksüogo. London nung Russia indang embassy taitsüba sentoka toktsür parnoki iba jenjang agiogo.

Challenger 2 tanks 14 ya taruba hoptatem nung agütsütsü aser gunners pongui achayangba self-propelled AS90 prangbong 30 shi agütsütsü, ta British Ato Kilonser office sangdong ajangsa metetdaksü.

UK-i, tank aser prangbongtem amshitsü atema Ukraine nunger sepaitem nem tangazükba agütsütsü.

"Ukraine nungertem Russia-i maneni amakba mapang ka nung parnok nem rara kokdaksütsü atema Ato Kilonser bendanga agütsür lir," ta Pm office otongdar kati ashi. "Pa nem military dak

sendakba nung shisatsü agütsürtem den pai, UK-i Ukraine nem teyari agütsüba ajanga temelenshi adokba asadangogo aser UK-i aser parnok den longjemer alirtemi kanga junga teyari agütsütettsü aliba lenmang kar bushitetogo," ta kasa sangdong ajanga metetdaksü.

Ukraine tir Volodymyr Zelenskyy den phone ajanga Honibarnü sensak asema sülen iba osang sangdonga liasü. Sensaksem mapang Sunak-i, Ukraine nem teyari tali agütsütsü tejangraba aliba lemsatep, kong Challenger 2 tanks aser artillery systems talila agütsütsüba densema liasü.

Germany, France aser United States nunger ajaki Ukraine nem armoured vehicle tem agütsütsü sentong aliba lemsatepba sülen Sunak indang office ajanga iba hopta tetenzüklen, Britain-i tembar linüktem den tongtepratepa inyaksangshitsü, ta metetdaksü.

Office ajangsa defence minister-i, security dak sendakba nung teyari agütsütsü aliba indang Hombarnü British parliament nung metetdaksütsü, ta ashi.

London nung Russian Embassy-i ashiba agi, tank yoktsü atema telemetba agiba ajanga rara atsülangdaksütsü aser civilian densema nisung timba asütsü, aser iba mangatettep nung London-i tali shilem agiba jangjatsür.

Challenger 2 ya rara dang amshiba tank ka lir koba tanga tank amaktsü atema design süa yangluba lir. Iba tank ya 1994 küm nungi British Army-i amshir. Challenger 2 ya Bosnia and Herzegovina, Kosovo aser Iraq-i yokogo, ta army-i ashi.

"Ato kilonser aser tir Zelenskyy nati tanga linüktemi teyari agütsüba pelashishia agizükogo, kong Poland-i Leopard tank company ka agütsütsü mulunga aliba densema lir," ta Sunak otogdari ashi.

MULUNGNEN 0



LT. N.TAKATEMJEN AIER
ASO : 07.03.1934
ASÜ : 07.01.2023

Onoki teti meima aliba Obala asür N. TAKATEMJEN AIER, 7 th January 2023 anepdang iba alima nungi pila ogo. Asükhü anogo nungi kija, kibong, lokti balala, shirnokisa pei-i akok yari nübu, rongsen, sarasadem aser shisatsü agi yaria aruogo, nenok ajak dang ozüi kangasa pelaba lemsat eper. Nenok temeim aser mapa tajung asoshi onoki Tsüngrem tenüng asanger. Tsüngrem tulusangi nenok ajak teti moajangma.

- Temeim Kinüngtsü, Chirnurtem, Semchirtem & Kinüngertem

OFFICE OF THE KANGTSÜNGTSÜR TELONGJEM TULI TENÜNGSANG AGÜTSÜR

Kangtsüng Kaketshir Telongjem ajanga 33 buba LKM saisapaong Football asaya nung mezüng jenjang (Champion) nung takok nguteta sensosanger dangi tenüng tajung bener arutsüba asoshi Kangtsüngtsür Telongjem Tuli-i kangasa pelaba den tenüngsang tulu agütsür.

Tsüngremi maneni Kangtsüng kaketshirtem moajangma.

Sd/-
Matsüngla
Tir

Sd/-
Toshienla
Tongti Zülur

Peru sorkari Lima nung emergency benokogo

Lima, Aenjeti/January 15 (Agencies): Peru sorkari linük yimtiba Lima densema tesem asem nung state of emergency benokogo. Hopta ishika tsüngda nüburtemi tir amena longkak aiba ajanga nisung 42 tashi asüba sülen tang sorkari iba jenjang agiogo.

Honibar aonung sangdongba state of emergency ya anogo 30 atema asütsü aser iba ajanga army nem tensa azüoktsü atema tashi taila agütsü aser freedom of movement aser assembly amala temzüng ozüng kübok temedentem aginer.

Tir Dina Boluarte anema longkak aiba ajanga iba South America linük ya mepetmesü tulu nung lir. Taoba tir Pedro Castillo, December ita office nungi aginba den ozüng alema Congress loksatsütsü merangba atema apuba sülen nüburtemi longkak ait tenzük.

Pa melena Boluarte tir asütsü asoshi shim, shiba tatong tir liasü.

Castillo pusemertemi hopta ishika linük kübok tesem balala

nung yimtung süa longkak aita senzüba den lenmang aika nokdanga yuogo. Parnoki election tasen agitsü aser Boluarte mapa nungi agintsü atema khanga arudar.

Brehostibarnü ketdangsürtemi Peru nung nüngtugu tourist site Machu Picchu-i aoba rail aser tayimtsü lenmang shibangja liasü, kechiyong longkak aitba tesashiba aküm aser police o longkak aiter tsüngda mangatettep adoka liasü.

Boluarte-i Hokolbarnü iba azütokshi lendong atema tatok meshiogo, ajisüaka mepetmesü adoker aliba teyalong nungbo la mapa nungi manentsü ta ashiba den longkak aitertemi constitutional assembly ka asoshi akhangba magizüki liasü.

Castillo, shiba ochi mashi ken o aika nung sendaka aliba atema tang bushisüngdangdar, pa ita 18 tashi sota ayutsü.

Küm ishika Peru nung yimden yimsüsüba tsütsü mepetmesü adoka arudar.

Küm pongu tsüngda Boluarte ya tri pongububa lir.

Karna Kadur & Nikhil Pal nati INRC 2022 - Round of Nagaland kokogo



Kohima, Aenjeti/January 15 (TYO): Arka Motorsports nungi Driver Karna Kadur den co-driver Nikhil Pal nati 4buba Indian National Rally Championship 2022 - Rally of Nagaland kokogo. Iba tetoktepba ya Federation of Motor Sports Council of India (FMSCI)-i ayongzük aser tetoktepba promoter ji Blueband Sports liasü.

Taküm iba asayamung ya Nagaland sorkar den longjemer Nagaland Adventure Club (NAC)-i achaayanga Kohima district nung asayaogo.

Snap Racing nungi Chetan Shivram aser Dilip Sharan na tanabuba aser Chettinad Sporting nungi Aditya Thakur

aser Virendra Kashyap na tasembuba jenjang nung liasü. Tanga category nung takok angurtem:

INRC 2: Winner - Chetan Shivram and Dilip Sharan of Snap Racing, 1st runner-up - Aditya Thakur and Virendra Kashyap of Chettinad Sporting and 2nd runner-up - Fabid Ahmer & Sanath G of Privateer.

INRC 3: Winner - Phillippos Matthai & Murthy P.V.S. of Arka Motorsports, 1st runner-up - Arnav Pratap Singh & Arjun SSB of Snap Racing and 2nd runner-up - Maninder Singh Prince & Vinay Padmashali of JK Rally.

INRC 4: Winner - Ruthuparna Vivek & Santosh

Thomas of Snap Racing, 1st runner-up - P. Ananth Kumar & Sagar Mallappa.

JINRC: Winner - Arnav Pratap Singh & Arjun SSB of Snap Racing, 1st runner-up - Arjun Rajiv & Pramod Raman of Snap Racing and 2nd runner-up - Nikeeta Takkale & Angela James of Snap Racing. Gypsy Challenge: Sanjay Agarwal & Shiv Prakash.

Iba tetoktepba ya Kohima Bye-pass two-lane lenmang nung km30 shi ayimjema asayaogo.

Sempet agütsüba sentong nung NACT tir Burakum Ao aser Chief Promoter Blueband Sports Premnath Kashinath nati takok angurtem nem sempet agüja liasü.

Australia den masaya tsüngda Jadeja Ranji nung asayatsü



New Delhi, Aenjeti/January 15 (Agencies): India nunger all-rounder Ravindra Jadeja, shiba temekok surgery agitsü atema taoba küm September ita Asia Cup nung masayatsü atema telemtetba agi, pa Ranji Trophy tatembangbuba round nung Tamil Nadu den Saurashtra nungi asayatsü renema lir, koba Chennai nung January 24 nü tenzüksü.

Arishi küm 34 tain asayar shiba tang National Cricket Academy nung temang anepaludar, pa Australia den asayatsü aliba Test asayamung nung mezüngbuba asaya ana atema India team nung züngoksemogo. Iba asayamung

ya Nagpur nung February 9 nü tenzüksü.

Ajisüaka pa asayatetsüsa anema lir ta kuli agütsüba sülenang asayatetsü aser iba telemtetba ya Ranji asayaba mapang agitsü.

"Pa Saurashtra nungi asayara tajung asütsü. Pa asayatsü imlar, saka iba dak sendakba nung ni osang tejangja magütsütetsü," ta Saurashtra Cricket Association tir Jaydev Shah-i PTI dang ashi.

Taoba küm August 31 nü Asia Cup nung Hong Kong den asayaba sülen Jadeja tang tashi nung khen danga asaya mali aser pa Test asaya nung tatensa England den taoba küm

July ita Edgbaston nung asaya liasü.

Jadeja NCA nung temang anepalua aliba tatembang ka dangi aruba mapang iba hopta tetenzük nungi asaya tenzüko. India team nung Rishabh Pant masayatetsüsa akümba sülen left-handed batter ya middle-order nung No 5 mesüra 6 nung asayatsü atema kanga tongtibang kümogo.

Kasa mapang nung ball aonba nunga off spinner Ravichandran Ashwin den külemi team atema kanga tongtibang asütsü. Asaya pezü asayatsü aliba asayamung ajanga India team World Test Championship final nung asayatsü masayatsü jangjatsü.

Australia den 2016-17 series nung Jadeja-i kanga tongtibang shilem agi. Pai wicket 25 agiba den run 127 yanglua Player-of-the-Series naroküm agizük. Iba asayamung ya India-i 2-1 agi koka liasü.

2017 küm nungi tang tashi nung Test asaya 19 nung Jadeja-i wicket 82 agia lir aser century ana den half century tenet densema run 898 yanglua lir.

AIFF-i India U-17 team sangdongogo

New Delhi, Aenjeti/January 15 (Agencies): India Under-17 head coach Bibiano Fernandes-i, UAE U-20 National Team den Dubai nung January 16 nü friendly asaya ka asayatsü aliba asaya atema asayar 22 shimba sangdongogo.

Iba asaya nung shilem agiba sülen kasa team ya India nung Uzbekistan den January 22 aser 24 nü Goa nung friendly asaya ana asayatsü, ta AIFF-i sangdong ka ajanga metetdaksü.

Caoch Bibiano Fernandes lenisüba nung India U-17 team taküm küm tetenzüklen asayatsü aliba AFC U-17 Asian Cup atema qualify süogo. U-17 team ya mapang tatsüka break agiba sülen taoba ita nungi camp nung shilem agi tenzüko.

Saudi Arabia nung AFC U-17 Asian Cup Qualifiers nung asayaba asayatem den ano team management-i Goa nung

AIFF Elite Academy nung camp ayongzüka agiba mapang trail atema tanga asayartema jaokogo.

India U-17 team nung asayatem:

Goalkeepers: Sahil, Julfikar Gazi aser Tajamul Islam.

Defenders: Ricky Meetei Haobam, Surajkumar Singh Ngangbam, Malemngamba Singh Thokchom, Balkaran Singh, Manjot Singh Dhami aser Mukul Panwar.

Midfielders: Vanlalpeka Guite, Danny Meitei Laishram, Korou Singh Thingujam, Huzafah Ahmad Dar, Faizan Waheed, Gurnjal Singh Grewal, Phoenix Oinam, Paikhomba Meitei Khumanthem, Lalpekhlu, aser Ashish.

Forwards: Aman, Thanglalsoun Gangte aser Shashwat Panwar.

Head coach: Bibiano Fernandes.

Lemi & Anchalem nati Mumbai Marathon kokogo

Aenjeti/January 15, 2023 (Agencies): Deobarnü Mumbai Marathon asaya nung otsü tasen aika yanglua asayaogo. Yimti nung Deobarnü ya iba season nung temekongtiba anogo liasü.

Tebur asemtepba nung Ethiopia nunger Hayle Lemi-i taoba mapang otsü tasen yanglur aliba dang nungi second 30 agi jelia 2:07:32 nung alizüng tongteta liasü. 2020 küm Derara Hurisa-i 2:08:09 nung alizüng tonga otsü tasen yanglur aliba pai ajatetogo.

Kasa mapang nung tetsürtem rongnung Ethiopia tsür Anchalem Haymanot-i alizüng 2:24:15 nung tongteta 2013 küm Kenya tsür Valentine Kipketer-i 2:24:33 nung alizüng tonga otsü tasen yanglur aliba ajatetogo.

Lemi aser Anchalem na nem senpet USD 45,000 den külemi course record bonus USD 15,000 agütsüogo.

Teburtem asemtepba nung Kenya nunger Philemon Ronoi 02:08:44 nung alizüng tongteta Lemi sülen tanabuba jenjang nung asemtepba tembang aser tasembuba jenjang nung Hailu Zewdu liasü, shibai alizüng 2:10:23 nung tongteta liasü.

Tetsürtem rongnungi Ethiopia tsürsa Rahma Tusa aser Letebrhan Haylay na tanabuba aser tasembuba jenjang nung liasü. Tenati 2:24:22 aser 2:24:52 nung alizüng tongteta liasü.

Tsüngsang temekong asüba ajanga otsü tasen yangluba nung shilem tulu agiogo aser teburtem rongnungi parnok 10-i parnok indang personal bests

dang nungi tajungba asemteta liasü.

2016 Boston Marathon akoksang Lemi-i ashiba agi, pai ghonda ana ser minute pongu nung alizüng tongteter lila, saka pa tang Mumbai nung mezüngbuba asemer aser taoba mapang iba asemtepba nung shilem agir aliba külem asayartemi asemtepba tatembanglen tsüngsang ya balaka akümer ta tekümdaksü metetdaksür liasü. Kasa mapang nung lenmang nung km32 atongba mapang atang kati (Peddar road flyover) atuba indang pa dang shir liasü.

Lemi-i, iba tekümdaksü metetdaksüba ya manga asübo pai tajungba asemteter lila, kechiyong iba ajanga pa asema yimya dak kongshia liasü, ta sasa bilemba lemsatapa liasü.

"Tsüngsang kanga tajung liasü. Kü dang ashiba ama tsüngsang tatsükba maküm. Atangai atuba dena kecha tasak masü asü. Iba atangi atuba ya lenmang nung tasaktiba jenjang ta ni memetet asü aser asemyonga aodang atangi atutsü atema tashi mintoktsü meranga asem. Ni minute ana agibo takaraba asemteter lila," ta Lemi-i ashi.

Kasa mapang nung Anchalem-i, "Iba ya ni atema mezüngbuba marathon liasü aser ni gold nguogo. Ni tsüngsang atema shisabulua liasü. Asaya tenzükdang ni asaya akoktsü ta mimla kechiyong tetsür asemteper tajung aika liasü. Asaya tatemi temang kanga junga liasü anungji asaya akoktsü atema asema liasü," ta ashi.

BILEMDANGANG
"Timla nung tanü anogo tenzükan."